

Ruffgräber
und Detitel

Der Herrm. v. B. B. B.
in L. H. H.

Anno 1525.

Handwritten text in Arabic script, likely bleed-through from the reverse side of the page.

Handwritten text in Arabic script, likely bleed-through from the reverse side of the page.

Handwritten text in Arabic script, likely bleed-through from the reverse side of the page.

Die 12 Artikel, Anz. P

R 56 | 4870 ^P



R'

(571 2674)

GOS. RA000747

Dem Christlichen Leser Fryd
vnd gnad Gottes durch Christum.



Es seyn vil wider Christen / die verzunde
vō wegen der versamleten Baurtschafft
das Euangelion zū schmehen vrsach ne
men / sagen / das sein die frucht / des neu
wen Euāgelions: Nymant gehorsam
sein / an allen ortten sich empor heben vñ
auff pōmen mit grossen gewalt zū hauff lauffen vñ
sich rotten / Geystlich vnd weltliche oberkeyten zū refor
mieren / außzürēitten. Ja vñleucht gar zū erschlagen:
Allen diesen Gotlosen freuenlichen vrteylern. Antwort
te diesen nachgeschriebene artickel / Am ersten / das sie die
seschmach / des worts Gottes auffheben / Zum andern
die vngheorsamkeit. Ja die empörung aller Baurren
Christenlich entschuldigen. Zum ersten ist das Euan
gelion nit ein vrsach der Empörungen oder auffrüren.
Dieweyl es eyn rede ist / von Christo dem verheysenen
Messia / Welchs wort vnd leben / nichts dan / liebe / frie
de / geduldt / vnd eynigkeyten lernet. Also das alle die in
diesen Christum glauben / lieplich / friedlich / gedültig /
vnd eynig werde. So dan der grundt aller artickel der
Baurren (wie dan klar gesehen wirdt) Das Euangeli
on zū hören / vnd dem gemess zū lebē / dahin gericht ist /
Wiemügen dan die widerchristen das Euāgelion ein
vrsach der Empörung / vnd des vngheorsams nēnen:
Das aber ettlich widerchristen vnd feynd des Euange
lij / Wider soliche anmüttung vnd begerung sich lönen
vñ auff bömen / ist das Euangelion nit vrsach / sonder
der Teüffel der schedlichst feyndt des Euangelij / der sol
liches durch den vnglaüben in den seynen erweckt. Dye

Die wider
Christen.

des neuen
Euangeli
frucht.

Antwort d
Artickel.

Entschülde
gen der Ar
tickel.

Röm. 1.

mitte das/das/wort Gottes (liebe / fried / vñ eynigkeit
lernent) vndergetrückt vnd weg genommen würde.

T Zum Andern dan klar vnd laüther volget / das die
Bäuren in iren Artickeln solches Euangelion zür lere
vnd leben begerend / nit mügen vngehorsam / Auffrü
risch/genent werden / Ob aber Gott die Bäuren (nach
seynem wort zü leben ängstlich ruffend) erhören will.
Rom. 11. Wer will den willen Gottes tadlen? Wer will in sein
Esa. 40. gericht greiffen? Ja wer will seiner Majestet widerstre
Rom. 8. ben. Hat er die kinder Israhel zü jm schreyend / erhört /
Exod. 3. vnd auß der handt Pharaonis erlediget? Wager nit
vnd. 14. nach heüt die seinen erredten? Ja er wirts erretten? Vñ
Luce. 18 in einer kurtz. Derhalbē Christlicher leser / Solche nach
uolgendt Artickel lese mit fleys / vnd nachmals vrteyl.

Hienach volgent die Artickel.

Der Erste artickel.



Vm Ersten/ist vnser demütrig bitt vnd beger/auch vnser aller wil vnd maynüg/das wir nün fürohien gewalt vnd macht wöllen habenn/eyn ganze gemeyn sol eyn Pfarrer selbs Erwölen vnd kysen. Auch gewalt habē den selbigen wider zū entsetzen/wañ er sich vngepürlich hielt. Der selbig erwölt Pfarrer sol vnns das heylig Euangeli laüter vnd klar predigen on allen menschl/chen zūsatz/ lere vnd gebot/dañ vns den waren gläubē stets verkündigen/gibt vns ein vrsach Got vnd sein gnade zū bitten/vns den selbigen waren gläuben einbyl den vnd in vns bestetten/Dañ wann sein gnad in vns nit eingebildet wirdt/so bleyben wir stets fleysch vnd blüt/das dan nichts nützig ist/wie klärlich in 8 geschriefft statt/das wir alleyn durch den waren gläuben zū Gott kōmen künden/vnd alleyn durch sein barmherzigkeyt sällig müssen werden/Darumb ist vns ein sollicher vorgeher vnd Pfarher von nöthen/vnd in dieser gestalt in der geschafft gegründet.

1. Thi. 3.
Titū. 1.
Acto. 14
Deu. 17.
Exod. 31
Deut. 10

Johā. 6.
Galat. 2

Der ander Artickel.

Zum Andern/nach dem der recht zehent auffgesetzt ist im alten Testament/vñ im newen als erfüllt/nichts destmynder wöllen wir den rechten Korn zehent gerne geben/Doch wie sich gebürt/dem nach man sol in got geben/vnd den seynen mittheylen/gebürt es einem Pfar/rer so klar das wort gots verkündt/Seyen wir des wil len hinsüro diesen zehent/vnser Kirch Pröbst so dann

Wie dann die gannze Epistell zū den Hebre ern sagt.

Psal 109

ein gemeyn setze Sollen sämten vnd eynnemen / daru^o
 eynem Pfarrer / so vonn eyner gantzen gemeyn erwölet
 Gen. 14. wirdt / sein zimlich genügsam vffenthalt geben / im vñ
 Deu. 18. den seynen / nach erkantnyß eyner gantzen gemeyn / vnd
 vnd. 12. was vber bleybt / sol man (armen dürfftigen / so im sel/
 Deu. 25. ben dorff verhanden seynd) mittheylen / nach gestalt der
 1. Tim. 5. sach vnd erkantnyß eyner gemeyn / was vber bleybt soll
 Mat. 10. man behalten / ob man Keyßen müßt von Landts not
 1. Cor. 9. wegen Darmit man keyn lands steuwer dürff auff den
 armen man legen / Sol mans vonn diesem vberschuss
 außrichten / Auch ob sach were / das eins oder mehr dör
 fer weren / die den zehent selbst verkaufft hettent auß et/
 lich herbie
 tung.
 Luce. 6. entgeltē / Sonder wir wöllen vns zimlicher weyß nach
 Mat. 5. gestalt vnd sach mit im vergleychen / im sollichs wider
 Mann soll mit zimlicher zyll vnd zeyt ablößen. Aber wer von key/
 nieman ni nem dorff solichs erkauft hat / vnd ire forfaren inen sel/
 chts nemen best solichs zü geeeygent haben / wöllen vnd sollen vnd
 seindt inen nichts weytthers schuldig zü gebē / allein wie
 obsteet vnsern Erwönten Pfarrer damit zü vnderhal/
 ten / Nachmalen ablößen / oder den dörfftigen mitthey/
 len / wie die heylig geschriefft innhelt / Sie seyen geystlich
 oder weltlich / den kleynen zehent wöllen wir gar nit ge/
 ben / Dañ Gott der herze das viech frey dem mensche be/
 Gen. 1. schaffen / das wir für ein vnzimlichen zehendt scherzen /
 den die menschen ertichtet haben / Darumb wöllen wir
 in nit weytther geben.

Der Dritt Artickel.

Esa. 53. **I** Zum Dritte ist der brauch bißher gewesen das man
 1. Pet. 1. vns für ir eygen leüt gehalten haben / wölchs zü erbar

men ist/angesehē das vns Christus alle mit seinem kost
 parlichen blüt vergossen/erlöst vnd erkaufft hat/Den
 hyrten gleych als wol als den höchsten/Keynen außgenō
 men. Darumb ersindt sich mit der schriefft das wir frey
 seyen/vñ wöllen sein/Nit das wir gar frey wöllen sein/
 Keyn oberkeyt haben wöllen/lernt vns gott nit/wir sol/
 len in gebotten leben/nit in freyen fleyschlichen mütwil/
 len/Sonder Got lieben/in als vnsern herrn/in vnsern
 nächsten erkennen/vnd alles das so wir auch gerne het
 ten/das vns Gott am nachtmal gebotten hat zū eyner
 lez/darumb sollen wir nach seynem gebott leben/zeyge
 vnd weyßt vns das gebot nit an/das wir der oberckeyt
 nit gehorsam seyen/nicht alleyn der oberckeyt/Sonder
 wir sollen vns gegē yederman demütigē/das wir auch
 geren gegen vnserer erwöltē vñ gesetzten oberckeyt (so
 vns vō got gesetzt) in allen zymlichen vnd Christlichen
 sachen geren gehorsam sein/seyen auch on zweyfel jr wer
 dent vns der eygentschafft/als war vnd recht Christen
 geren entlassen/oder vns im Euangeli des berichte das
 wirs seyen.

1. Cor. 7.

Rom. 13

Sap. 6.

1. Pet. 2.

Deut. 6.

Mat. 4.

Luce. 4.

Mat. 5.

Johā. 13.

Rom. 13

Acto. 5.

Ein Christ
 lich herbie
 tung.

Der Vierd artickel.

¶ Zum Vierden ist bissher im braüch gewesen/dz Keyn
 armer man nit gewalt gehabt hat/das wilpret/gefögel
 oder fisch in flyessenden wassern nit zū fahen zū gelassen
 werden/welchs vns gantz vnzymlich vñ vñbrüder/
 lich dünckt/Sonder eygen nützig vñ dem wort gottes
 nit gemess sein. Auch in ettliche örtern die oberckeyt vns
 das gewiltdt zū trütz vñ mechtigem schaden habē. Will
 vns das vnser (so got dē menschen zū nutz wachsen hat
 lassen) die vnuernünfftigen thier/zū vnnutz erfrezen
 mütwilliglich/leyden müssen/darzu stillschweygen/das

Gen. 1.

Acto. 10.

1. Thi. 4.

1. Cor. 10. wider Got vnd den nechsten ist. Wan als gott der herr
Collo. 2. den menschen erschuff/hat er im gewalt geben vber alle
*Ein Christlich herbie-
tung.* thier/über den vogel im läufft/vñ über den fisch im wass-
ser. Darumb ist vnser begeren/wan eyner wasser hett/
das ers mit genügsamer schrift beweysen mag/dz man
das wasser vnwissenlich also erkaufft hette/begerē wir
jms nit mit gewalt zū nemen/Sonder mann müst eyn
Christlich einsehen darinnen haben/von wegen brüder-
licher lieb/aber wer nitt genügsam anzeygen darumb
kan thun/sols einer gemeyn zimlicher weyß mitteylen.

Der fünffte artickel.

Wie obenn
im erste ca-
pitel des er-
sten buchs.
Mosi ange-
zeygt ist.

Hir auß nit
aufrechtig
des holzes
geschehenn
wird ange-
sehē die ver-
ordnetenn.
Eyn Chri-
stlich erbie-
tung.

T Zum fünffte/seind wir auch beschwert & beholtzūg
halb/dan vnser herrschafften haben inen die holtzer al-
le alleyn geeeygent/Vñ wan der arm man was bedarff
müß ers vmb zwey gelt kauffen/ist vnser meynūg was
für holtzer seyen/es habens Geystlich oder Weltlich in-
nen/die es nicht erkaufft haben/sollen eyner ganzen ge-
meyn wider anheym fallen/vnd einer gemeyn zimlicher
weyß frey sein/eyn yeglichen sein notturfft ins hauß zū
brēnen/vmb sunst lassen nemmē/auch wan von nöten
sein würdt zū zimern auch vmb sunst nemen/doch nit
wissen der so vō der gemeyn darzū erwelet werden. So
aber keins für handē were/dan das/so redlich erkaufft
ist worden/Soll man sich mit dem selbigen brüderlich
vnd Christlich vergleichen/Wan aber das gut/am an-
fang auß inen selbs geeeygent wer worden/vnnd nach-
mals verkaufft worden. soll man sich vergleychen nach
gestalt der sach vnd erkantnuß brüderlicher lieb vnnd
heyliger schriefft.

Der Sechste artickel.

Zum Sechsten/ist vnser hart beschwerung der dienst halben/welche von tag zu tag gemert werden vnd täglich zu nemē/begeren das man ein zymlich einsehen dar inn thū/vns der massen nit so hart beschweren /sonder vns gnedig herinnen ansehen / wie vnser Eltern gedienet haben/alleyn nach laüt des wort gottes. Rom. 10

Der Siebendt artickel.

Zum Siebendē/ das wir hinsüro vns ein herschafft nit weytther wöllen lassen beschweren /sonder wie es ein herschafft zimlicher weys eym verleyht/also sol ers besitzē/laüt der vereynigung des Herren vnd Bäuwen/ Der herz sol in nit weytther zwingen noch dringen mehr dienst noch anders von im vmb sunst begeren /damit der Bäuwer sollich gut on beschwert also rüwigglich braüchen vnd nyessen müg. Ob aber des herren dienst von nöten weren /sol im der Bäuwer willig vnd gehorsam für ander sein / doch zu stundt vnd zeyt / das dem Bäuwen nit zu nachtheyl diene / vnd ime vmb eynen zymlichen pfenning den thün. Luce. 3.
Tessa. 6.

Der Achte artickel.

Zum Achten/seindt wir beschwert/vñ der vil/so güter innhaben/das dieselbig gütter die gült nit ertragen künden/vnd die Bäuwen das jr daruff einbüessen vnd verderben/das die herschafft dieselbigen gütter Erbar leit besichtigen lassen / vnd nach der billigkeit eyn gült erschöpff/damit der Bäuwer sein arbeit nit vmb sunst thue/dan ein yeglicher taglöner ist seins lons wirdig. Mat. 10.

Der Neundt artickel.

B

Esaie. 10. ¶ Zum Neündten / seind wir beschwert / der grossen fre
 Ephe. 6. uel / so man stedts new satzüg macht / nit das man vns
 Luce. 3. strafft nach gestalt der sach / sonder zü zeytten auß gros /
 Hiere. 6. sem neyd / vnd zü zeytten auß grossen günst. Ist vnser
 meynüg / vns bey alter geschriebener straff straffen / dar
 nach die sach gehandelt ist / vnd nit nach günst.

Der zehendt artickel.

Wie oben. ¶ Zum Zehenden / seindt wir beschwert / das ettlich has
 Luce. 6. ben inen zü geeygnet / wiesen / der gleychen ecker / die dan
 eyner gemeyn zügehörendt / Die selbigen werde wir wi /
 der zü vnßern gemeynen handē nemen. Es sey dan sach
 Christlich
 erbietung. das mans redlich erkauft hab / wañ mans aber vnbil
 licher weyß erkauft hett / soll man sich gütlich vnd brü /
 derlich mit eynander vergleychen nach gestalt der sach.

Der Eylffte Artickel.

Deut. 18. ¶ Zum Eylfften wollen wir den braüch gnant den tod
 Mat. 8. fall gantz vn gar abthon haben / den nymer leyde noch
 Mat. 23. gestatten / das man wittwen / weysen / das jr wider Gott
 Esaie. 10. vnd eeren / also schendelich nemen / beraüben soll / wie es
 an vil ortten (mancherley gestalt) geschehen ist / vnd vō
 den / die sie beschützen vn beschirmē solten / handt sie vns
 geschunden vnd geschaben / vnd wañ sie wenig süg het /
 tent gehabt / hettent diß gar genomē / das Got nit mer
 leyden will / sonder sol gantz absein / Keim mensch nichts
 hinfüro schuldig sein zü geben / weder wenig noch vil.

¶ Beschluß.

¶ Zum Zwölfften / ist vnser beschluß vn endtliche mey

nung/wañ einer oder mehr Artikel als hie gestellt (So dem wort gottes nit gemess) weren/als wir dan nit ver meynung/die selbigen Artikel/wo man vns mit dem wort gottes für vnzwmlich anzeygen/wolt wir darvon abston/wañ mans vns mit grunde der schriefft erklet. Ob man vns schon ettlich Artikel yetzt zu ließ/vnd hernach sich befündt/das vnrecht weren/sollen sie vō stunden an todt vnd absein/nichts mer gelten/der gleychen ob sie in der schriefft mit der warheit mer artikel erfunden/die wider Gott vnd beschwernysß des nächsten weren/wollen wir vns auch vorbehaltē/vñ beschloßsen haben/vnd vns in aller Christlicher leer üben vnd braüchen/darumb wir God den herren bitten wollen/der vns dasselbig gebē kan vnd sonst nyemandts. Der Fried Christi sey mit vns allen. Amen.

Dweyl alle artikel im wort gotes begriffen sein Christlich herbiezung.

Anno. 1525. des Monadts Marcij.

